

- (2) Naknada se isplaćuje posljednjeg dana rada u organu državne službe.

Član 19.

(Naknada za rad u komisijama)

- (1) Članovi komisija koje se formiraju na osnovu rješenja Vlade Kantona odnosno rukovodioca organa uprave, kada poslove kao član komisije obavlja iznad radnog vremena, imaju pravo na maksimalnu mjesečnu naknadu za rad u komisijama do visine jedne i pol (1,5) osnovice iz člana 5. Zakona.
- (2) Odlukom Vlade Kantona reguliše se način i uslovi obrazovanja komisija i način ostvarivanja naknade, a tačan iznos odnosno visinu naknade za rad svojim aktom utvrđuje Vlada Kantona, odnosno rukovodilac organa državne službe, za svaku pojedinačnu komisiju.
- (3) Naknade za rad u komisijama iz stava (1) ovog člana, a koje se finansiraju od uplata fizičkih ili pravnih lica, ne ulaze u ograničenje iz stava (1) ovog člana.

Član 20.

(Naknada roditelju djeteta sa težim smetnjama u razvoju)

Roditelj djeteta sa težim smetnjama u razvoju (teže hendikepiranog djeteta), koji radi polovinu punog radnog vremena, u slučaju da se radi o samohranom roditelju ili da su oba roditelja zaposlena, pod uvjetom da dijete nije smješteno u ustanovu socijalno - zdravstvenog zbrinjavanja, na osnovu nalaza nadležne zdravstvene ustanove, pripada pravo na naknadu plaće do visine pune plaće, dok ovo pravo na naknadu ne bude regulisano posebnim zakonom.

Član 21.

(Otpremnina)

Državni službenik i namještenik ima pravo na otpremninu pri odlasku u penziju u visini svojih pet ostvarenih prosječnih neto plaća isplaćenih u prethodnih pet mjeseci.

IV. PLAĆE ZA PRIPRAVNIKE I NAKNADE ZA LICA NA STRUČNOM OSPOSOBLJAVANJU BEZ ZASNIVANJA RADNOG ODNOSA

Član 22.

(Plaća za pripravnike)

- (1) Plaća pripravnika visoke, više i srednje stručne spreme u Ministarstvu utvrđuje se u iznosu i to:
- za visoku školsku spremu u iznosu od 80% od početne osnovne plaće utvrđene za radno mjesto stručnog suradnika;
 - za višu školsku spremu u iznosu od 80% od početne osnovne plaće utvrđene za radno mjesto samostalnog referenta;
 - za srednju stručnu spremu u iznosu od 80% od početne osnovne plaće utvrđene za radno mjesto referenta.
- (2) Početna osnovna plaća iz stava (1) ovog člana predstavlja samo iznos bez dijela plaće po osnovu penzijskog staža.

Član 23.

(Visina naknade za lica na stručnom osposobljavanju bez zasnivanja radnog odnosa)

- (1) Lica na stručnom osposobljavanju bez zasnivanja radnog odnosa visoke, više, srednje stručne spreme u Ministarstvu imaju pravo na naknadu i to:
- za visoku školsku spremu u iznosu od 35% od osnovne plaće stručnog suradnika;
 - za višu školsku spremu u iznosu od 35% od osnovne plaće samostalnog referenta;
 - za srednju stručnu spremu u iznosu od 35% od osnovne plaće referenta.
- (2) Visina plaće iz stava (1) ovog člana određuje se od osnovne plaće odgovarajuće školske spreme.

V. OBRAČUN I ISPLATA PLAĆE

Član 24.

(Način obračuna i isplata plaće)

- (1) Plaća se obračunava za jedan mjesec unatrag, a isplaćuje se za prethodni mjesec u skladu sa Zakonom o radu i Zakonom o izvršavanju Budžeta Kantona Sarajevo i od jedne do druge isplate plaće ne može proći više od 30 dana.
- Plaća iz stava 1. ovog člana utvrđuje se rješenjem koje donosi ministar, a sadrži: lične podatke državnog službenika i namještenika, radno mjesto na koje je postavljen, platni razred i sve elemente koji su uzeti u obzir za utvrđivanje visine plaće.
 - Podaci o plaćama državnih službenika i namještenika su javni.
- (2) Sve izmjene u visini plaće vrše se rješenjem kojeg donosi ministar.

VI. PRELAZNE I ZAVRŠNE ODREDBE

Član 25.

(Prestanak važenja dosadašnjih pravilnika)

Stupanjem na snagu ovog pravilnika, prestaje da važi: Pravilnik o plaćama i naknadama državnih službenika i namještenika Ministarstva za boračka pitanja Kantona Sarajevo broj: 06-02-2711/12 od 28.02.2012. godine i Pravilnik o izmjeni Pravilnika o plaćama i naknadama državnih službenika i namještenika Ministarstva za boračka pitanja Kantona Sarajevo broj 06-02-19140/13 od 05.07.2013. godine.

Član 26.

(Stupanje na snagu)

Ovaj pravilnik stupa na snagu danom donošenja, a primjenivat će se od dana stupanja na snagu Zakona o plaćama i naknadama u organima vlasti Kantona Sarajevo.

Broj 06-02-4220/19

21. februara 2019. godine
Sarajevo

Ministar

Mr. Ismir Jusko, s. r.

GRAD SARAJEVO

Gradsko vijeće

Na osnovu člana 26. stav 1. tačka 2. i tačka 18. Statuta Grada Sarajeva ("Službene novine Kantona Sarajevo", broj 34/08 - Prečišćeni tekst), Gradsko vijeće Grada Sarajeva, na sjednici od 26.06.2019. godine, donijelo je

ODLUKU

O USLOVIMA I NAČINU DODJELE

"ŠESTOAPRILSKE NAGRADE GRADA SARAJEVA"

Član 1.

"Šestoaprilska nagrada Grada Sarajeva" (u daljem tekstu: Nagrada) dodjeljuje se kao najviše društveno priznanje za značajna ostvarenja i značajne rezultate rada u oblastima:

- privrede,
- nauke i obrazovanja,
- kulture i umjetnosti,
- sporta,
- zdravstva i socijalne zaštite,
- drugim oblastima rada i stvaralaštva, bez obzira na godinu ostvarenja, a koji doprinose ukupnom unapređenju, promociji i razvoju Grada Sarajeva, kao glavnog grada Bosne i Hercegovine i Federacije Bosne i Hercegovine.

Član 2.

Pod značajnim ostvarenjima, u smislu ove Odluke, podrazumijevaju se djela ostvarena u kontinuitetu koja se ocjenjuju kao doprinos razvoju odgovarajuće oblasti, u skladu s kriterijima uobičajenim za konkretnu oblast, a koja doprinose ukupnom razvoju, odnosno promociji grada Sarajeva.

Član 3.

Kriteriji za dodjelu Nagrade su:

- a) za pojedince:
 - izuzetan doprinos u odbrani države Bosne i Hercegovine,
 - postizanje značajnih rezultata u oblasti nauke, obrazovanja, zdravstva, socijalne zaštite, kulture, sporta, amaterskog stvaralaštva i drugih društvenih djelatnosti ili najboljih rezultata u teorijskom i praktičnom radu na pojedinom području javnog djelovanja,
 - doprinošenje unapređenju radnih procesa kreativnim radom ili inovacijama,
 - dobivanje domaćih i međunarodnih priznanja za vlastite inovacije,
 - objavljivanje, prikazivanje, izlaganje, izvođenje ili prezentovanje na neki drugi način vlastitih ostvarenja značajnih za širu zajednicu,
 - ugled i visoke moralne vrijednosti.
- b) za pravna lica:
 - upošljavanje većeg broja radnika,
 - ostvarenje značajne dobiti u poslovanju,
 - vršenje znatnijih ulaganja u proširenje proizvodnih i drugih kapaciteta,
 - postizanje poslovnih uspjeha na nivou međunarodnih standarda,
 - najmanje pet godina postojanja i kontinuiranog djelovanja,
 - renome uzornog pravnog lica.

Član 4.

Za dodjelu Nagrade, početkom decembra, u sredstvima javnog informiranja objavljuje se javni poziv za predlaganje kandidata za dodjelu Nagrade u tekućoj godini i traje 45 dana.

Nagrada se dodjeljuje:

- Pojedincu
- Grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada), i
- Kolektivnu (privrednom društvu, ustanovi, udruženju i drugom pravnom subjektu s područja grada Sarajeva, kao i onom van područja grada Sarajeva, ako se njihova ostvarenja, odnosno rezultati rada odnose na grad Sarajevo).

Član 5.

Nagrada se ne može dodijeliti organima uprave svih nivoa vlasti u BiH, izabranim funkcionerima, poslanicima, vijećnicima svih nivoa vlasti u Bosni i Hercegovini i njihovim srodnicima za vrijeme trajanja njihovih mandata, kao ni zaposlenima u organima uprave svih nivoa vlasti u BiH za ostvarenja koja se odnose na djelovanje u okviru djelokruga posla koji vrše u organu uprave.

Član 6.

Nagrada se dodjeljuje u obliku povelje, uz novčani iznos koji odlukom utvrđuje Gradsko vijeće na prijedlog Administrativne komisije Gradskog vijeća.

Kad se Nagrada dodjeljuje grupi, svaki član grupe dobija povelju.

Novčani dio Nagrade iz stava 1. ovog člana, raspoređuje se članovima grupe u jednakim iznosima.

Član 7.

Povelja iz člana 5. stav 1. i 2. Odluke sadrži tekst: "BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, GRAD SARAJEVO", sa suhim grbom Grada Sarajeva, centriran na vrhu stranice formata A3. Ispod teksta iz stava 1. ovog člana, ispisuje se sljedeći tekst: "Na osnovu Odluke Gradskog vijeća Grada Sarajeva o dodjeli "Šestoaprilske nagrade Grada Sarajeva", broj ____, dodjeljuje se:". Na sredini povelje je tekst: "ŠESTOAPRILSKA NAGRADA GRADA SARAJEVA", ime i prezime lica, odnosno imena članova grupe ili naziv kolektiva kojima se Nagrada dodjeljuje. Ispod teksta iz prethodnog stava, ispisuje se kratko obrazloženje, odnosno navodi se oblast rada i stvaralaštva u kojoj je dobitnik Nagrade ostvario značajne rezultate. U donjem lijevom uglu je oznaka datuma, mjesta i broja odluke, a u donjem desnom uglu je potpis gradonačelnika Grada Sarajeva. O izgledu Povelje, odlučuje Gradonačelnik uz prethodno mišljenje Komisije za izbor i imenovanja. Uz Povelju se uručuje i Odluka Gradskog vijeća Grada Sarajeva o dodjeli "Šestoaprilske nagrade Grada Sarajeva" za odgovarajuću godinu, kojom se utvrđuje vrsta i sadržaj Nagrade, dobitnik Nagrade, te uručivanje Nagrade od strane Gradonačelnika na svečanoj sjednici Gradskog vijeća Grada Sarajeva.

Član 8.

U jednoj godini može se dodijeliti najviše šest Nagrada, iz svake oblasti jedna, bez obzira da li se radi o pojedinačnoj, grupnoj ili kolektivnoj Nagradi.

Nagrada se istom licu, iz člana 4. Odluke, može dodijeliti samo jedanput.

Član 9.

Nagrada se dodjeljuje svake godine i uručuje 6. aprila, na Svečanoj sjednici Gradskog vijeća. Nagradu uručuje Gradonačelnik i Predsjedavajući Gradskog vijeća.

Član 10.

Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica, sa područja Sarajeva.

Subjekti iz stava 1. ovog člana, nemaju pravo isticanja sopstvene kandidature za Nagradu.

Prijedlog iz stava 1. ovog člana podnosi najviši kolektivni organ upravljanja, Skupština ili Upravni odbor odlukom tih organa o podnošenju prijedloga kandidata za Nagradu s tim da je uz prijedlog dužan dostaviti pismenu saglasnost kandidata da prihvata kandidaturu, te jasno definisati oblast za koju se kandidat predlaže.

Pravo predlaganja kandidata za Nagradu ima i Gradonačelnik.

Član 11.

Prijedlog iz stava 3. prethodnog člana dostavlja se u tri (3) primjerka sa detaljnim podacima i obrazloženjem.

Obrazloženje sadrži podatke o kandidatu, ukupan radni opus i posebne zasluge u oblasti zbog kojih se kandidat predlaže za nagradu.

Član 12.

Gradsko vijeće imenuje Odbor za dodjelu "Šestoaprilske nagrade Grada Sarajeva" (u daljnjem tekstu: Odbor) najkasnije na oktobarskoj sjednici.

Odbor iz stava 1. ovog člana čine članovi Komisije za izbor i imenovanja Gradskog vijeća i šest istaknutih javnih djelatnika iz oblasti:

- privrede,
- nauke i obrazovanja,
- kulture i umjetnosti,
- sporta,
- zdravstva i socijalne zaštite,
- drugih oblasti rada i stvaralaštva, za koje se Nagrada dodjeljuje.

Kolegij Gradskog vijeća Grada Sarajeva kandidira Komisiji za izbor i imenovanja kandidate za članove Odbora iz reda istaknutih javnih djelatnika, iz prethodnog stava. Komisija za izbor i imenovanja utvrđuje prijedlog i upućuje ga Gradskom vijeću Grada Sarajeva na razmatranje i usvajanje.

Predsjedavajući i zamjenik Predsjedavajućeg Odbora se biraju na prvoj sjednici Odbora.

Mandat članova Odbora iz reda istaknutih javnih djelatnika traje do okončanja postupka izbora laureata za tu godinu.

Član 13.

Odbor iz prethodnog člana ove odluke, na prvoj sjednici, donosi Poslovnik kojim se uređuje način rada, a posebno se definiše tajnost rada Odbora i imena kandidata za dodjelu, do donošenja konačne odluke Gradskog vijeća o dodjeli Nagrade.

Poslovnikom iz stava 1. uređuje se način glasanja Odbora bodovanjem u drugom ili trećem krugu i to tako da kandidat koji ne ostvari minimalan broj bodova Odbora ne može biti predložen Gradskom vijeću na konačno odlučivanje.

Član 14.

Ukoliko Odbor u toku postupka za dodjelu "Šestoaprilске nagrade Grada Sarajeva" utvrdi da predloženi kandidat ispunjava uvjete za neku drugu oblast, Odbor može predložiti da se o njegovoj kandidaturi glasa u drugoj oblasti.

Član 15.

U prvom krugu, članovi Odbora glasanjem utvrđuju liste kandidata koji zadovoljavaju uvjete propisane Odlukom i Javnim pozivom u pojedinačnim oblastima.

Član 16.

U drugom krugu glasanja, Odbor primjenjuje način bodovanja, preciznije utvrđen Poslovnikom o radu, te Gradskom vijeću predlaže najmanje dva prvorangirana kandidata, ako ih je bilo dva ili više, u suprotnom jednog ukoliko je jedan kandidat dobio minimum broj bodova ili ni jednog ako nije dobio nijedan bod.

Gradsko vijeće donosi konačnu odluku tajnim glasanjem na zatvorenoj sjednici za javnost.

Član 17.

Ukoliko Odbor ocijeni da određeni prijedlog kandidata ne ispunjava uslove za dodjelu Nagrade, Odbor može uputiti inicijativu prema ovlaštenim predlagачima, gradskim vijećnicima ili gradonačelniku, da podnesu prijedlog za dodjelu drugog priznanja ili nagrade Grada Sarajeva, u skladu sa Odlukom o priznanjima i nagradi Grada Sarajeva.

Član 18.

Članovi Odbora se obavezuju na tajnost svih podataka o kandidatima, obavezuju se da ne daju izjave u medije ili preko društvenih mreža, sve do zvanično upućenog prijedloga Gradskom vijeću Grada Sarajeva.

Član za kojeg se utvrdi da je prekršio obavezu tajnosti, trajno se isključuje iz rada Odbora.

Član 19.

Nagrada koja se dodjeljuje pojedincu, odnosno grupi, može se oduzeti.

Pod oduzimanjem nagrade podrazumijeva se oduzimanje povelje pojedincu, odnosno članu grupe. Nagrada se oduzima ako je nagrađeno lice pravosnažnom sudskom presudom

osudeno od Međunarodnog suda za ratne zločine počinjene na teritoriji bivše Jugoslavije, ili koje je pravosnažnom sudskom presudom, od bilo kojeg suda sa područja Bosne i Hercegovine, osudeno za krivično djelo protiv života i tijela na kaznu zatvora od najmanje godinu dana, protiv slobode i prava građana, protiv dostojanstva osobe i morala, protiv imovine, protiv pravosuđa, protiv službene i druge odgovorne dužnosti, protiv osnova društvenog uređenja i sigurnosti.

Nagrada se može oduzeti ako je nagrađeno lice pravosnažnom sudskom presudom osudeno na kaznu zatvora preko tri godine ili težu kaznu, a ne radi se o krivičnom djelu iz prethodnog stava.

Član 20.

O oduzimanju Nagrade odlučuje Gradsko vijeće na prijedlog Odbora.

Odluka o oduzimanju Nagrade objavljuje se u "Službenim novinama Kantona Sarajevo" i sredstvima javnog informisanja.

Član 21.

Ukoliko priznanje, odnosno nagrada nije uručena dobitniku za života, predaje se članovima njegove uže porodice (bračni drug, djeca i roditelji) i o tome se izdaje potvrda.

Član 22.

Članovi Odbora imaju pravo na naknadu za svoj rad.

Visina naknade iz stava 1. ovog člana se utvrđuje na isti način kao i za ostala radna tijela Gradskog vijeća, a na prijedlog Administrativne komisije Gradskog vijeća.

Član 23.

Sredstva za dodjeljivanje Nagrade i za rad Odbora obezbjeđuju se u Budžetu Grada Sarajeva i Odluci o izvršenju budžeta.

Član 24.

Služba Gradskog vijeća vrši stručne i administrativne poslove i vodi evidenciju o dodijeljenim Nagradama.

Član 25.

Gramatička terminologija korištenja muškog i ženskog roda u ovoj Odluci podrazumijeva uključivanje oba roda.

Član 26.

Danom stupanja na snagu ove Odluke prestaje da važi Odluka o uslovima i načinu dodjele "Šestoaprilске nagrade Grada Sarajeva" ("Službene novine Kantona Sarajevo", broj 3/17 - Prečišćeni tekst i 49/17).

Član 27.

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-GV-02-749/19
26. juna 2019. godine
Sarajevo

Predsjedavajući
Gradskog vijeća
Dr. Igor Gavrić, s. r.

Na osnovu člana 15. Zakona o pravobranilaštvu Kantona Sarajevo ("Službene novine Kantona Sarajevo", broj 33/08 - Novi prečišćeni tekst, br. 7/12 i 44/16), člana 26. stav 1. tačka 2. i člana 73. Statuta Grada Sarajeva ("Službene novine Kantona Sarajevo", broj 34/08 - Prečišćeni tekst), odredbama Odluke Gradskog vijeća Grada Sarajevo o davanju saglasnosti i ovlaštenja Gradonačelniku i Pravobranilaštvu Grada Sarajevo za rješavanje imovinsko-pravnih odnosa objekta Zgrade željezničke stanice Bistrik u cilju pristupanja realizaciji Projekta obnove i rehabilitacije historijske građevine-Zgrada željezničke stanice Bistrik u Sarajevu kao nacionalnog spomenika broj 01-GV-02-247/19 od 20.02.2019. godine ("Službene novine Kantona Sarajevo", broj 10/19), Gradsko vijeće Grada Sarajeva, na sjednici održanoj dana 26.06.2019. godine, donijelo je